

B. N. C.
FIRENZE

1066

23

1066.23

1711
ETRS.

100

VI
FIRST

1066.23

Celf.^{mi} ac Rev.^{mi} Principis

^{AT}
FERDINAND

Episcopi Paderbornensis

Coadjutoris Monasteriensis

Comitis Pyrmontani & Liberi Baronis

DE FVRSTENBERG

Votiva Epigrammata,

Divis Titularibus

LUCIÆ VIRG. ET M. SYRACUSANÆ,

LIBORIO EPISC. CENOMANENSI,

MEINOLPHO DIAC. PADERBORN.


ſacra,

cum Poëmatiis

Iacobi V Vally & Danielis Papebrochij

è Societate JESU,

*redditam Principi ſanitatē gratulantium
quem mortuum fama vulgaverat.*



STRATOCLES

*Falso de victoriâ nuntio Thebanis
à se delato:*

Quid injuriæ vobis intuli,
qui meâ operâ triduum læti fuistis?

Plutarch. in Præcept. Polit.

F A M A

*De Episcopi & Principis Ferdinandi morte
vulgato à se rumore:*

Quid egi, nisi ut majore lætitiâ
eo recepto quisquæ frueretur?

CELSISSIME PRINCEPS.

Dysenteria, qua praterita aestate totam pene pervagata est & afflixit Germaniam, è vivis sublatum Te rumor vulgaverat. Ego, cui magnum studiorum nostrorum praesidium periisse videbatur, eo nuntio percussus, de nostro Nicolao Schateno queri, quod jacturam communis utriusque Macenatis prius debuerim ex publicis literis discere, quam vel de periculo per eum admonerer. Ab ipso responsum frustra praestolanti adfertur epistola, manu Tuâ exarata; nuntiatque, lue illa apud Te Neubusij obiisse Schatenum, IX Kal. Septemb. Te vero eâdem quidem, à XVI Kal. Augusti usque ad XVI Kal. Septembr. correptum jacuisse, Medicis vitam desperantibus: sed facto D. Luciae voto ita subito integrèque convaluisse, ut memoria defuncti, viri de universa Westphalia historiâ, quam scribebat, optimè meriti, epitaphium hoc scribere ac ponere potueris, in ade DD. Henrico ac Cunigundæ Augg. sacra:

Occidit Historiæ patriæ lux magna, SCHATENUS,

Quam perfecturus, si licuisset, erat.

Invidit Lachesis: quâ vitæ stamina rupit,

Historiæ filum rupit iniqua manu.

Non ideo tamen illa minus vulgata per orbem

A sera nomen posteritate feret.

Quam dedit obscura rebus jam nocte sepultis,

Auctori vitam nobile reddet opus.

Addebas, quod à Wallio nostro atque à me soteria expectares: quibus, ut par erat, missis; ne nullum vicissim remissi ac soluti post morbum animi signum dares, ad Musas divertisti; & Vota Tua, quæ, ut majori cura ac religione persolvi viderentur, in pedes suos numerosque coegeras, visum fuit ad nos mittere. Cum autem in proximo essent

4
Paschalia festa, ut ea tibi fausta ac fortunata non sine aliquo munusculo precaremur, illud de Tuo nostroque consecimus; animumque induximus nostrum, quemadmodum cum Deo sua tribuimus cum nobis demeremur, ita officij atque observantia erga Te nostra rationes integras fore, si prospera omnia Tibi precati, Tua Tibi redderemus. Vale. Antuerpia. III Idus Aprilis anni MDC LXXVII.

CELISSIMÆ GRATIÆ TUE

* Infimus Cliens

Daniel Papebrochius S. I.



DIVÆ

DIVÆ LUCIÆ
Virgini & Martyri Syracusanae,
SERVATRICI
in dysenteria & hamorrhoidum acutissimis doloribus,
FERDINANDVS
Episcopus Paderbornensis,
Coadjutor Monasteriensis &c.

VOTVM
Anno MDCLXXVI.

O ! quid torminibus præsens medicina levandis
Ferre laboranti, Virgo, moraris opem ?
Tu mortalis adhuc, ægræ solatia matri
Diceris in tanto, Diva, tulisse malo.
Addita nunc cælo potes omnia : pelle dolores,
Qui miseris urunt viscera nostra modis.
Quem non ulla queunt medicamina sistere fluxum
Sanguinis, ah! votis siste vocata meis.
Quodque Agathæ potuere preces, sit fas mihi per te
Carminе votivo dicere, posse tuas.
Concordes animæ, quas nunc par junxit Olympi
Gloria, par olim virginitatis amor :
Este mihi faciles, & pro me jungite vota :
In manibus vestris vita salusque mea est.
Prosit, opemque ferat, siquid tamen illa merentur,
Muneribus me vos demeruisse meis.
Altera nunc à me * positas sibi conspicit aras :
Altera, si valeam, munera vota feret.

5 EPISCOPO ET PRINCIPI

Solvisti meritas dotali munere grates :

Dos mihi, ne munus despice, carmen erit.
Carmine fit vivax meritum : neque nesciet ætas

Postera, quod vivam, munus id esse tuum.
Vota etiam, pro me salvo tibi debita, reddet
Unanimis Vatum, qua valet, arte, chorus.
Quam mihi præstiteris testabitur ara salutem,
Et suspensâ tuo sacra tabella tholo.

In scribam: QUA TE, VIRGO, TRIBUENTE REVIXI,
LUX MIHI NATALIS SEMPER HABENDA LOCO.

* Sacellum D. Agathæ Virg. & Mart. ad incolarum religionem
amplificandam, extruxi in Siddeffe anno MDCLXVIII.

*Talia meditante Te, Princeps Cellissime, festinans ego
Tuo ac meo voto exolvi, ad ejusdem Divæ sospita aras
hosce versiculos appendendos scripsi.*

Diva potens; morbos semper miserata fluentes,
Sanguine jam venas destituente suas :

Accipe servatâ meritas pro Principe grates,
Illimes Paderæ cui famulantur aquæ.

Ille sacri fidus Custos & Pastor ovilis,
Ille decus patriæ delictumque suæ

BERNANDUS, quam pene fuit ! Jam fama, fuisse
Dixerat : & passim credita fama fuit.

Tristia defuncto jam pangebamus amici
Carmina, in exequias ultima dona pias,

Vivere cum sese scribit mœrentibus ipse :
Vivere sed scribit munere, Diva, tuo.

Stringere quem nullæ potuere Machaonis artes,
Strinxerunt fluxum vota petentis opem.

O benè, quod lucis teneas à nomine nomen,
Lux oculis per quam redditur illa meis,

Nunc

Nunc elegos; dum magna suo sequar ordine cœpta,
A tibi devoto pectore plura feres.

Venerit extremis tandem manus ultima fastis,

Ipse tuâ plenus laude December erit.

Sive tuo referam quæsitâ sanguine palmas,

Sive (quod ô!) numquam non ero, Virgo, tuus.

Na ego humana conditionis non satis memor esse videar, si vastissimi operis, plurium vires lassantis & lassaturi, metam ultimam scribendo vivendoque attingere, & in S. Lucia illustrandâ vitâ operam ponere me posse sperem. Quam à decessoribus accepi lampada, neque segniter aliquo tenus pratuli, eam aliis tradam, ac supplicibus votis exposcam in eorum recipi societatem, quibus nunc devotum studium, & vitam habeo occupatam. Hujus vero poëmatij fructus non levis fuerit, si eorum qui ad S. Lucia Acta pervenient, memoriam commovero, ut ejus clarissimis maximisque beneficiis annumerent sanitatem redditam Principi, de hoc opere nostro suâ beneficentiâ optimè merito. Addant P. Godefridum Henschenium grate ac pie commemorare solitum, vitam se debere matris de se gravida & dysenterica voto, S. Lucie nuncupato; adeoque patrocinio ejus prius se servatum fuisse quam natum.

Hac ego: Wallius vero noster, quam fuerat ad primum credita mortis rumore commotus vehementer, tam eleganter infirmulavit Famam, quod optimum quemque acerbissimo nuntio in summum dolorem temere conjecisset, per epistolam sic pralocutus,

CELISSIME AC REVERENDISIME PRINCEPS.

Habet hoc poëticum studium, præ ceteris ingenuarum artium disciplinis eximium, quod in utrâque fortunâ sive luctum solari, sive gratulandi causas exponere luculentius,

lentiùs, & ornatius possit. Tanta in eo est copia, seu potius laetitiam elegantium verborum, & sententiarum gravitas, & in aures animumque suaviter illabentium numerorum vis, & è purissimis hausta fontibus divinarum humanarumque rerum scientia. Viriusque argumenti magnam mihi materiam tristis & jucunda res obtulit. Percrebuerat fama publicis dissipata literis, quæ ex more quaque hebdomade in Brabantia Hollandiâque in lucem editæ, nuntiant quidquid uspiam ferè terrarum memoratu dignum geritur, Te dysenteria, vulgato per universam Germaniam malo, è vivis excessisse. O luctuosum, & acerbum omnibus nuntium, & mihi quidem, quem amici singularis nomine in literis Tuis dignari soles, singulariter gravem! Gravi illo casu perculsa Musa mea, ut sese aliquâ ex parte relevarent, de Epicedio, doloris solatio dicam, an fomento? cogitabant. Nequibant certè primùm sibi sic imperare, ut tristissimæ carminis initium, nedum exitum invenirent. At ecce Tua ad me data litera gratissima, si ulla umquam, & Tuâ quidem manu, ut semper, conscripta mihi redduntur: quibus Te è morbo, cujus levandæ spem medici abjecerant, S. Lucia patrocinio recreatum scribis. Come est illud Ciceronis, quod, ut in loco, referre hîc lubet. Egrotabat Atticus, atque hoc illi significaverat literis ab Alexide liberto suo, qui illi à studiis & epistolis erat, scriptis, inter cujus & Attici manum nihil admodum intererat. Tum urbanè Cicero: * Alexidis manum amabam, quod tam propè accedebat ad similitudinem tuæ: literæ manum non amabam, quia indicabat te non valere. Ego verò manum illam Tuam creberimis literis Tuis mihi cognitissimam non amarem, à quâ nuntium acceperam, quo neque verior, neque optatior ad me perferri poterat? Cùm illam dissuaviari coràm non liceret, quod licuit, illis quas expresserat notis reverentet osculum

* Lib. 7. ep. 2.

dedi. Ab acerbo igitur luctu ad certam, & ut solent res inexpectata esse latiores, uberrimam latandi causam tractus silere non potui. Non potui in ordinum & atatum omnium de vitâ Tibi restitutâ gratulantium concursu atque latitiâ non aliquem etiam jucunditatis mea fructum ad Te mittere. Mihi sanè, itâ vivam, nullum unquam sereniore animo carmen provenit, quàm hoc ipsum, quo Te Tibi, & Ecclesia, & Imperio, & bonis, & literatis omnibus redditum gratulor. Efferebat sese inter scribendum insatiabili gaudio completus arrectusque animus, gestiebatque redintegratâ Tibi valetudine amoris etiam officiique redintegratione non modò veterem meam ergà Te observantiam renovare, sed etiam testatorem auctioremque facere. Satis profectò mihi materia dederat Fama, quare falsâ certum, eumque acerbissimum dolorem omnibus inusserat. Itaque primùm illam temeritatis insinulavi sue, quòd Te, quem propter immortalia merita nemo non immortalem esse vellet, immaturè nobis praeceptum esse pervulgasset. Sed hæc est, ut ait * Plinius, cum de his, qui elati revixerunt, agit, conditio mortalium: ad has, & ejusmodi occasiones fortunæ gignimur, uti de homine nè morti quidem debeat credi. Tum funestam contagione mortis Tua paginam, quam ipsa longè lateque sparserat, non ovis & sulphure, sed è sacrorum ritu carmine lustrandam duxi. Postremò jussi illam in manus hominum carmen hoc dare, tum ut honorariam rumoris à se temerè dissipati multam lueret, tum ut vero latoque nuntio tantum animos omnium diffunderet, quantum antea vano & funesto contraxerat. Tu verò antè omnes, Princeps Celsissime atque Humanissime, hisce versiculis adde vultum, quem Tibi confirmata valetudo reddidit, hilarem vitalemque, qui cum meâ, & omnium, qui

* Lib. 7. cap. 52.

Te amant, coluntque, latitia & gratulatione consentiat. Qui convaluerunt, non illicò ad res arduas difficilesque præctandas sese conferunt: diverticula quadam amant. Ab agendis igitur rebus ad brevem animi remissionem, ad amœnißimum secessum Te sevoco, ad Heliconem, ad Tuas measque delicias. Hic Plinium alterum, nullâ spe, nullo timore sollicitatum, nullis rumoribus inquietum, secum tantum, & cum libellis loquentem audire te volo. O rectâ sinceramque vitam! ô dulce otium honestumque, ac pænè omni negotio pulchrius! O FONTES, O LAURI, verum secretumque Musæum, quàm multa invenitis, quam multa dictatis! Proinde Tu quoque Te curis paullisper eripe, & hoc quod affero, bono vultu lege. Vale Musarum præsidium, & decus, & Magni Patruï Tui, cui Sbcietas nostra tantum debet, quantum se persolvere non posse gaudet, annos exple, & de nostris auge. Contraci, anno à natali Christi MDCCLXXVI, à Tuo, qui in XII Kal. Nov, incidit L: qui ut multos per annos celebrandus candidior semper candidiorque redeat, vitæ auctorem Deum precor,

* Lib. I, epist. 9.

IN FAMAM.

AT tibi, Fama, malum quo non funestius umquã
 Vatis allabi poterat, stent limina centum
 Clausa seris, servetque vigil custodia i portas.
 Dum tibi nulla sera est, dum nocte dieque patefcunt
 Atria, dum præbes avidas venientibus aures,
 Tu nullo veri, nullo discrimine ficti,
 Quidquid id est, dubiis, ut sunt, auctoris effers.
 Sæpè insperatis cumulas nova gaudia rebus:
 Sæpè etiam ingenti permisces omnia luctu.
 Mirabar, dum luce bonâ bona dicere verba

Insti-

Institeram, quid tantum animus torperet, & altos
In gemitus oculis sensim rorantibus iret.
Rumor ad inferias, rumor (sic namque ferebat)
Fernandi ad tumulum, & funebria sacra vocabat.
Flendus erat: flentem vix hæc me pauca sinebat
Edere præcludens vocem dolor: Hei mihi, quantum
Præsidium Musæ, & quantum vos perditis Artes,
Per quas Fernandi tollit se gloria cælo!
Eripitur nostri Mæcenas maximus ævi:
Qui Musas colit, & cultis sua præmia ponit,
Eripitur. Quando hoc pietas nunc debita poscit,
Ite pij Vates, cineri superaddite laurum,
Laurum perfusam lacrymis, titulumque sepulcro.

Hæc super in vulgum sparsis, Fernande, canebam
Illacrymans, cum visa mihi non illa doloris
Privati facies, qualis cum litera nostrâ
Ducta manu casus, aut mortes narrat acerbis,
Inque sinu, quodcumque mali est, deponit amantis.
Ibat ad occasum rumor gravis, ibat ad ortum:
Et qui virtutis præconia fecerat antè
Magna tuæ, magnis implebat questibus orbem.

Cum jam pressa diu tacitus dolor ora teneret,
His sua vix tandem rupit suspiria dictis.
Heu quianam & pesti de te, Germania, tantum
Sanguineæ licuit? quid Marte cruentior ipso
Tot dedit infantes leto, dum cruda mali vis
Tabentes venas, vitæ claustra, resolvit?
Danubiusnè parum, Rhenusque, & decolor Albis
Sanguinis immisit pelago, cum miles ab Arcto
Barbarus Austriadas armis incessit iniquis?
Conjurata (nefas) augebant fœdera vires.
Quid te nunc, amor Austriadum, Imperiique Latini
Grande

Grande decus, Patriæque Pater, miseranda cruoris
 Proluvies vulgo, & pallentibus addidit umbris ?
 Integer Heroum 3, priscæque ab origine gentis
 Ad te demissus sanguis, plebeia tot inter
 Funera, dum miseri furit inclementia morbi,
 Miscendus tabo fuerat ? Quis talia flendo
 Ipse sibi flendi leges, & tempora ponat ?
 Te patrij lugent amnes 4, mœstique requirunt,
 Omnes funereis velati frondibus, omnes
 Auratam effusis spargentes fletibus urnam.
 Dû Padera 5, hospitio Regû memorandus & armis,
 Urbe fluet mediâ, mediâ lugeberis urbe.
 Amissus 6, qui quodd titulo, quodd carmine notum
 Erumpat fontem scatebris non antè repertis,
 Qui quodd pro topho puros de marmore puro
 Ejecet latices, tibi se debere fatetur,
 Qui tibi Nestoreos meritis pro talibus annos
 Voverat, heu voto mœret frustratus inani.
 Deleto quondam gayissus Luppia 7 Varo,
 Te gemit extincto. Qualis legionibus olim
 Amissis Cæsar, squallenti turbidus ore,
 Impexusque comâ, foribus narratur apertum
 Impegisse caput, cladem indignatus, & Urbi
 Ereptas repetens Aquilas, decora alta Quiritûm,
 Æterni signa Imperij : sic ille dolori
 Impar sæpè suo, taurini cornua vultus
 Nequicquam illidit ripis, Mihi reddite, Divi,
 Vociferans, mihi Fernandum mors invida redde.
 Hæc eadem, quâ sese illi committit, 8 Aliso
 Ingeminat : procul arguto responsat ab antro,
 Punicibusque cavis abruptæ vocis imago.
 Nympha tibi, sacris Paduli 9 quæ præsidet undis,
Libandos

Libandos nuper latices, medicamina morbi,
Nunc importunæ solatia frigida mortis
Dat lacrymas. Tibi Fons Resonus ¹⁰ graviore sonorus
Prorumpit strepitu, raptos sibi questus amores.
Et meritò. Nam quis sese tibi laudibus æquet?
Non tu condis opes. Si; cùm sol igneus orbem
Conscendit medium, terras humentibus umbris
Nox operire potest, poterit quoque clara tenebris
Celari virtus, & quas ad sidera duxit
Illustres Divùm signis & numine moles.
Fortunate operum! ejus tot templa, ¹¹ tot aræ
Assurgunt opibus. Vox hæc est una colonis:
Quod lætæ campis segetes, & vitibus uvæ,
Quod benè sit pecori, quod apes fragrantia plenis
Stipent mella favis, Superùm sunt omnia munus.
At merito in tanto pars est tua: debita templis
Dona tuis ferimus, lectas de messe coronas,
Aut mites uvas, aut mollis vellera lanæ,
Flaventesque favos. Si spe præsumere viles
Hoc potuere animæ, Nos exoravimus aras:
Tu bonus erexti. Dum vomeris usus honorque
Ullus erit, nostri ruris te digna manebit
Gloria. Jamque aliquis forsàn, dum frigora captat,
Tityrus agrestem meditatur arundine musam,
Et patrias resonare docet tua nomina silvas.
Sed neque Relligio ¹², non si vigor æthere ab alto
Plurimus illapsus venis mentemque animumque
Intus agens moveat, meritis persolvere possit:
Digna tuis: digna his cælum, sed fera, rependet.
Contemptu rerum felix, divesque beatâ
Pauperie, thalami que expers, animoque volente
Imperium jurata pati, tibi templa, tibi aras,
Liminaque

Liminaque, & quæ se tolerat, gratissima debet.
 Collidi Scythico quàm non indigna Gradivo
 Creta fuit ! stat adhuc armis imperdita nostris,
 At lacera, & dirum vix eluctata furorem.
 Hanc tu etiam (neque fama levis) servasse fereris,
 Dum tua victrices meruerunt æra catervæ.
 Quid referam, quæ, ceu remis utaris, & aurâ,
 Consilia aggredieris, placideque & fortiter urges?
 Quid vigiles noctes, totque inter sætia dulces
 Musarum lusus, & caris facta Poëtis
 Otia, quid patriis Monumenta perennia fastis
 Eruta, quid reliquas, & dignas Principe curas?
 Ah, spes incertæ rerum ! quot gaudia sæpè
 Dissipat una dies, & funere turbat acerbo !
 Non hoc Fernandus de se sperare jubebat,
 Non vigor ille ingens animi, non cognita virtus,
 Et nondum canos advelans infula, crines.
 Sed fore, qui Pattuum meritis anteiret & annis:
 Qui populos, qui jura diu, moremque sacrorum
 Defensum daret, & magna inter præmia quondam
 Duceret innumeras vinclis Acherontis avari
 Ereptas animas, cælique in parte locatas:
 Qui procul hærentes Vates, quò prævius ibat,
 Aonas ad montes, Permessiaque antra vocaret,
 Divinas Phœbi jussos accingier artes.
 Quid non antè diem leti vis horrida vertit?
 Sic fera tempestas spem longi intercipit anni.
 Solibus, & Zephyris resoluta tepentibus arva
 Laxant feta sinum: Cerealibus edita sulcis
 Semina formosum tollunt caput: omnis olentes
 Induitur flores arbor: opulenta colonos
 Spes alit ignaros hiemis, fortisque futuræ.

Cum

Cùm subitò horrendùm toto fragor æthere creber
Intonat : insequitur Rhodopes à vertice præceps
Immitis Boreas, & mistis grandine nimbis
Culta terit : nullas exspectant horrea messes:
Fraudentur pomis nondùm pubentibus horti.
Sunt hæc, sunt casus tantùm simulamina nostri.
Non illum graviter pro jacturâque dolendum
Longa dies ratioque levet. Durabit in ævum
Mortis acerbis honos, & Vates more piorum
Annua funebri recolent Fernandia versu.

Talibus atque aliis (nam quid non acre doloris
Invenit ingenium?) te quisque urgebat ademtum,
Flebilibus sese incendens, Fernande, querelis.
Quas nunc, dum salvum nobis te 15 amica reservant
Numina, ferre dedit levibus trans æquora ventis.
Te tamen, ô digne antè alios vivace senectâ,
O Vatum communis amor, quo sospite non me,
Non alium Musas olim coluisse pigebit,
Te propè depositum (rumor non omnia finxit)
Te propè florenti consumptum luximus ævo.
Ut sua servatus narrare pericula gaudet
Navita, si fortè in fractâ sese abiecte pictum,
Humentesque mari vestes, velamina fixit
Vota tholo : sic usque tibi, sic usque recurret
Lucia, votivo dignandum munere nomen,
Dum tua manantem referes in viscera mortem.
Jamque adeò non ova mihi, 16 non sulphura pone
Viva, puer: lustranda mihi contagia morbi
Carmine, quod grati dicat sibi sospita Virgo
Muneris esse loco, quod Fama per ora manusque
Præcipuè Vatum vultu ferat ipsa sereno.
Antè tamen, Merui, dicet, neque pendere multam
Deprecor:

16 EPISCOPO ET PRINCIPI FERD. SOTERIA
Deprecor: indignis (magna hæc injuria falsi est)
Omnia complevi lacrymis: me verius unam
Commisssa hæc luere, & veniam exorare precando.
Tum verò nostra hæc, sint qualiæcumque, legenda
Porriget, exigua ingentis solatia luctus.
Forſitan, & nè rumorum tot millia tritas
Præcipitent, velut antè, vias, atque omnia turbent,
Muniet ærato ſubeundos cardine poſtes,
Jam melior, jam docta malo, ſtudioſaque veri.

Quidquid erit, nos te fruimur, Fernande, tuæque
Mortis in expletum fas eſt gaudere periculo.
Omnia tecum unà redierunt gaudia: tecum,
Ut poſt informes hiemes, atque horrida Cauri
Frigora, nos verni reficit clementia cæli
Gratior, & dulcem ſtudioſum aſpirat amorem.
Ut cultas olim Regum indulgentia Muſas
Extulerit, nullò tantum ſe Principe tollent.
Non illis Helicon patuit: tantum ardua longè
Culmina proſpexere, atque huc nitentibus ultro
Vatibus arrexere animos, plauſumque dedere,
Qualis & Eleo miſſos è carcere iuvit
Clamor equos. Tu carmen amas, & ſcribis, & idem
Per ſe curſuros, & jam juga ſumma tuentes
Acriùs inſtigas: te Mæcenate recepto
Numinis afflatu ruſſum propiore caeſcent.

N O T Æ.

1. **S**ERVETQUE VIGIL CUSTODIA PORTAS. Domus
Fama ab Ovidio ingenioſo architecto fabricata portis
caret, quòd in illam promiſcùè vera falſaque ſeſe inferunt,
atque hinc ruſſus in publicum procuſſent, nullo aditum,
nullo exitum prohibente.

2. **Hæc**

2. HEU QUIANAM, pro, cur. *Quintilianus, qui Virgilij codicem ipsius manuscriptum habuit: Cùm sint, inquit, verba propria, ficta, translata, propriis dignitatem dat antiquitas. Namque & sanctiorem, & magis admirabilem faciunt orationem, quibus non quilibet fuerat usus, eoque ornamento acerrimi iudicij P. Virgilius unicè est usus. Olli enim & Quianam pellucet, & aspergunt illam, quæ etiam in picturis est gratissima, vetustatis inimitabilem arti auctoritatem. Hæc ille lib. 8. cap. 3. Usus autem est hac voce Ennius, Plautus, aliique, à quibus sibi exemplum habuit Virgilius bis eadem usus. Quod nescire is solum potest, qui cum Virgiliano pastore illud de se fateri debet:*

Nunc oblita mihi tot carmina. *Ecl. 9.*

3. INTEGER HEROUM. *Quod iis dictum sit, qui Germanicè nesciunt, Furst Heroem, Berg montem significat. Planè ut Illustrissima Furstenbergiorum gens. sui cognomenti notione insignis, & Heroibus inclyta, & velut illa in Euangelio memorata civitas in monte posita, spectabilis sit, propter eminentem dignitatis suæ gradum.*

4. TEPATRII LUGENT AMNES. *Amænâ & à nullo adhuc usurpatâ inventione Eruditissimus Princeps Ferdinandus Monumenta sua Paderbornensia à fontibus, quos habet ille terrarum tractus & multos, & salubres, & celebres, orditur, ac brevi priùs comprehendit carmine, quàm eadem uberius illustrata Lectori proponat.*

Nam quamquam sapor est ablatâ dulcis in undâ,

Gratiùs ex ipso fonte bibuntur aquæ.

Ovid. 3. Pont. eleg. 5.

Cùm verò nihil sit Poëtis Gracis Latinisque usitatus, quàm in communi mœnore fontes amnesque lugentes inducere; ego Paderbornensium luctum expressurus, meliore

B

causâ

causâ potui veterum exemplo idem facere.

5. **DUM PADERA HOSPITIO REGUM.** Padera caput nobilitant Leonis Pontificis Maximi, & Caroli Magni, & multorum consequentium Imperatorum & Regum hospitium, & Imperatoria S. Cunegundis inauguratio, & externorum Principum legationes, & Francorum Saxonumque conventus, & castrorum metationes.

6. **AMISIUS, QUI QUOD TITULO.** Illum sic loquentem inducit Princeps Ferdinandus :

Qui centum delabor aquis comitatus in æquor,

Antè pererratis urbibus & populis :

Nunc caput occultum rimatus valle sub imâ

Fernandus, niveo condecorat lapide.

At tibi Nestorei meritis pro talibus anni,

Lætaque perpetuo tempora vere fluant.

Et nomen, Fernande, tuum sic crescat eundo,

Aucta velut nostræ gloria crescit aquæ.

Gemino huic Amisij voto, pro meo ergà Optimum Episcopum & Principem officio ac potius pietate, subscribo, cujus neque virtus, neque fama umquam consenescet.

7. **DELETO QUONDAM GAVISUS LUPPIA VARO.** Al Luppiam Romanorum exercitus disciplinâ, manu, experientiâque bellorum Princeps ad internecionem trucidatus est. Quâ nuntiata clade aded consternatum ferunt Augustum, ut per continuos menses barbâ capilloque summisso caput interdum foribus illideret vociferans : Quintili Vare, legiones redde. Velleius, Tacitus, Suetonius, aliique.

8. **HÆC EADEM, QUÆ SESE ILLI COMMITTIT, ALISO.** Aliso fluvij nomen, & castelli, quod contrâ Sicambros Nero Claudius Drusus ad Luppia & Alifonis confluentes posuit.

9. **FONS PADULUS** antè Neuhusium, consuetum Episcoporum

coporum & Principum Paderbornensium domicilium, fuit, cujus aquâ in febris ardoribus recreatus aliquando fuit Ferdinandus Princeps.

10. TIBI FONS RESONUS. Nomen hujus fontis accolis est Bulderborn. Bulderen Teutonicè cum strepitu blaterare, aut detonare significat. Ferunt, quoties se ad cursum refert (neque enim jugiter, sed intervallis fluit) sibilum per cacumina arborum exaudiri, velut exsurgentis venti impetum ab aquâ proveniente, qua foras cum strepitu erumpere gestiât, & ad cava vicinorum montium vim suam allidat & frangat.

11. FORTUNATE OPERUM, CUIUS TOT TEMPLA, TOT ARÆ. Rara, &, nisi fidem templa & aræ, quas jurati tangimus, facerent, incredibilis Ferdinandi Principis in res sacras religio, ac munificentia. A fontibus suis exemplum sibi cepit, qui quò plus aquarum dederunt, plus affundunt. Quod autem templa multa in pagis ab eo aut erecta, aut instaurata sint, id materiam carmini dedit.

Neuhusij templum paroecia à fundamentis exstruxit.

In pago Corbeke templum funditus collapsum restituit, & ornavit.

In Cleinenberg templum paroecia malè tectum, & vetustate collapsum refecit.

Templum Bustorffianum, ad formam Hierosolymitanæ Ecclesiæ olim constructum, arâ maximâ & porticu ornavit.

In Lichtenau templum paroecia, vetustate & incendio deformatum, restituit ornavitque.

Templum S. Crucis exstruxit in Altebecâ.

Templum paroecia in Oberkirchen, Furstenbergiorum dynastiâ, restituit.

Paroecia templum & turrim de calo tactam in superiori Tudorp instauravit.

Sacellum gentilitium SS. Philippo & Iacobo Apostolis, antiquâ Furstenbergiorum religione positum, Theodori Episcopi Paderbornensis Magni Patru sui impensis resectum, injuriâ deinde temporum & bellorum iterum labe factatum instauravit, ornavit, ampliavit.

S. Philippo Nerio gravi morbo liberatus, sacellum ex voto positum perfecit.

Sacellum S. Anna collapsum, novum exstruxit in Amerungen.

In Siddeffen exstruxit sacellum S. Agatha Virgini & Martyri.

In Wirriessen sacellum S. Michaëlis Archangeli exstruxit, ornavit, dedicavit.

Benè tibi, sit Princeps Religiosissime, qui opes, non virtutum, ut multi, sed virtutum, ut pauci, habes adjumenta: benè tibi Deus, benè Cœlites velint, quorum cultui eas liberalissimè infumendas putasti.

12. SED NEQUE RELIGIO. Paderborna Patribus Franciscanis templum & Monasterium à fundamentis exstruxit.

Warbutgi Cœnobium Patrum Prædicatorum restituit, & ornavit.

In Graffschafft templum Ordinis S. Benedicti arâ maximâ, & novis in utroque latere positis altaribus exornavit, donatoque perpetuo censu quinque sacra anniversaria sollempni ritu ibidem celebrari jussit, in suam suorumque, qui ejusdem Monasterij Advocati fuerant, memoriam.

13. COLLIDI SCYTHICO. In belli Cretici subsidium ingentem pecunia vim ad Clementem 1^x Pontificem Maximum misit: qui de hac insigni liberalitate gratias illi, sanè quam pro eo ac merebatur, amplissimas egit his literis.

CLE-

CLEMENS PP. IX.

Venerabilis Frater salutem & Apostolicam benedictionem. Non sinè præcipuo lætitiæ & animi grati sensu profectò audivimus, quanto piæ religionis, & ergà Sanctam hanc Sedem & Nos filialis obsequij studio Fraternitas Tua opem defensionis Candidæ conferre parata sit. Cui sanè tam promptæ voluntati ac liberalitati, uti nunc paternæ mentis præcipuâ caritate respondemus, ità quoties occasio tulerit, omnibus in rebus ad rationes Tuas pertinentibus benignè prolixèquæ satisfacturi sumus, cùm præsertim ea sit generosa virtus & magnanimitas Tua, ut etiam pollicitis addere & cumulare velit, quidquid prætereà in Comitibus publicis decerneretur. Quod etsi sponte Tuâ Te facturum esse offers, tamen pro muneris nostri debito, & summâ rei gravitate, quantum maximè possumus, vehementer etiam atque etiam postulamus. Interim egregiæ pietati Fraternitatis Tuæ retributorem Deum accuratè precamur, Apostolicamquæ benedictionem peramanter impertimur. Datum Romæ, apud S. Mariam Majorem sub annulo Piscatoris, Pontificatus Nostri anno secundo, 4 Maji, 1669.

F. FLORENTINUS.

His adjunxit suas Eminentissimus Cardinalis Rospigliosus.

Ill.^{mc} & R.^{mc} Domine,

Egregia liberalitas, quâ D. T. Ill.^{ma} Venetâ Republicam adversus Christiani nominis hostem adjuvat, dignum Te loco prædicat, quem & in exi-

stimatione Aulæ Romanæ, & in Sanctissimi D. N. benevolentia, & in Ecclesiæ Hierarchiâ amplissimum obtines. Magno omnium plausu & commendatione exceptus est hujus rei nuntius, sed Sanct. Sux animum præcipuo quodam gaudij sensu perfudit, quod tan illustri factò, & filialis in se obsequij devotionisque plenissimo, videt suum in Te amplectendo, & rebus Tuis savendo judicium comprobari: quodque exemplo tam liberali planè confidit ceteros Germaniæ Principes ad commune rei Christianæ periculum propullandum advolaturos. Sanè quantum ad veterem Sanct. Sux in Te amorem magnanimâ istâ pietatis Tux significatione cumulum adjunxeris, conjicies ex literis Pontificiis, quæ his adjunctæ D. T. Illustrissimæ reddentur. Sed ex opportunitatibus, quæ se dabunt ornandi Tui, id ipsum planè perspicies. Ad me quod pertinet, gratissimum mihi feceris, si operâ industriaque meâ in Tuis & Ecclesiarum Tuarum rebus frequenter uteris, quemadmodum & vetus nostra amicitia, & Tua eximia virtus, ac præclara in Religionem Catholicam, atque in hanc Sanctam Sedem merita postulant. Læta interim D. T. Illustrissimæ omnia cum diuturnâ incolumitate auguror. Datum: Romæ, 4 Maji, 1669.

Macte istâ tuâ præstabili virtute & magnificentiâ Ferdinando. Missum sacro bello subsidium religionis defensæ partem Tibi acceptam feret. Tempia & ara à Te posita monumenta erunt tuæ pietatis, ultra avi tui terminos duratura. A te exstructa cœnobîa divinas laudes etiam tum in terris per te concinent, cum tu illas in Cælestium choro excipies, & subsequeris. Spectetur in hac paginâ, tamquam

in

in tabellâ rudi penicillo adumbratâ tuum illud in divino cultu augendo tutandoque studium, quo aureos tibi ad calum gradus fruis, nec de hominibus tantum, sed quodam etiam modo de Deo ipso benè mereri studes.

14. QUID REFERAM, QUÆ, CEU REMIS UTARIS ET AURA, CONSILIA AGGREDERIS.

SUAVITER ET FORTITER. Tessera Ferdinandi Principis est. Quæ venustius explicari non potest, quàm per navim velo & remis impulsam.

15. DUM SALVUM NOBIS TE AMICA RESERVANT NUMINA. Libuit hîc mihi tenui in re periculi, quo defunctus es, Princeps Celsissime, imaginem aliquam cogitationi Tuæ subicere, cùm neque mihi ex Virgilij auctoritate syllabam insequentis verbi conflictio, neque Tibi vitam, quæ Dei benignitas fuit, morbus & incommodorum concursus ἐξέθλιψε.

16. NON OVA MIHI, NON SULPHURA PONE. De ovis & sulphure in lustrationibus adhiberi solitis constat ex Homero, Tibullo, Propertio, Iuvenale, aliisque. Vnum Ovidij locum produxisse satis sit, cum amantis agra thalamum illâ ratione lustrari jubet, aitque id officij genus multis viam aperuisse, ut in tabulis suprema voluntatis, seu testamentis locum sortirentur.

Et veniat, quæ lustret anus lectumque, locumque,

Præferat & tremulâ sulphur & ova manu.

Omibus his inerunt gratæ vestigia curæ:

In tabulas multis hæc via fecit iter.

Ovid. lib. 2. de Arte.

Mihi verò, Celsissime ac Reverendissime Princeps, satis est morbi Tui contagionem Dei beneficio, & S. Lucie patrocinio expiatam carmine posse gratulari.

FERDINANDVS

Episcopus ac Princeps Paderbornensis ;
Coadjutor Monasteriensis ,

S. P. D.

*Iacobo VVallio è Soc. Iesu ,
Amico suo singulari.*

C Armen Sotericum, quod natali meo die misisti, elegans & venustum, ut omnia tua, arcanâ vi ita me rapuit atque excitavit, ut votum D. Luciae Servatrici meae, quod in ancipiti ac diuturno morbo animo conceperam, his versiculis subitò expresserim. De carmine verò tuo eas tibi gratias, hoc est maximas, ago, quas tam præclarum opusculum meretur. Deum porrò obsecro, ut votum tuum natali meo susceptum ratum esse velit, mihiq; modum & occasionem suppeditet summis tuis erga me meritis aliquâ parte respondendi. Vale, meque, ut facis, ama tui amantissimum, & in precibus meis memorem, quas etiam à te exposco. Paderbornæ, Kal. Novemb. MDCLXXVI.

Hac illi scribere dignata est consueta Tibi erga clientes benignitas : qua & meum obsequium gratum habere dignatus, addidisti alia votiva Epigrammata duo, ornandis Sanctorum Fastis aliquando servitura : quæ interim dum ad Iulium atque Octobrem processerit opus nostrum pluteo abdita premere, nefas credidi ; ideoque hic subjunxi : & hos, quos versibus Tuis celebras ; & omnes, quos nostro labore illustratos cupis Sanctos, Tibi propitios optans.

A D

AD S. LIBORIVM

Cenomanensem Episcopum, Paderbornensem
Tutelarem,

Arenarum & calculi doloribus afflictorum

Præcipuum apud Deum Advocatum,

Cujus sacra Reliquia religiose asservantur

In æde Cathedrali Paderbornensi,

F E R D I N A N D U S

Episcopus Paderborn. Coadjutor Monasterien. &c.

S Alvete, ô sacri cineres : salvete, Libori
Prodigiis celebres grandibus exuviz.
Gallia vos olim Cenomanis misit ab oris,
Nunc columen Paderæ præsidiumque meæ.
Vos ego, vos supplex veneror: tu, quæ damus urnæ
Oscula, tu nostras accipe, Dive, preces.
Sic erit ut numquam morbo me tentet acuto
Calculus, aut renes urat arena meos.
His Te namque malis mira virtute mederi
Multa docet sacris fixa tabella tholis.
Sic mea Musa tuos late celebrabit honores
Supplicibus facilem sæpe ferentis opem.
Sic mihi semper erunt niveis signanda lapillis
Tempora, sic aliis candida semper erunt.

Tibullus At tu natalis multos celebrande per annos
Candidior semper candidiorque redi.

*Possunt igitur Candida tempora vocari, id est, fausta, si dies
candidus vocatur.*

EJUS-

E J U S D E M
 D E S. M E I N V L P H O ,

Paderbonensi Diacono & Indigena,

Qui multis clarus miraculis

In cœnobio Bodecensi, loco natali quiescit & colitur

III Non. Octob.

Non pietate minus quam sanguine 1 clarus avito
 Meinolphus, Paderæ gloria prima suæ,
 Hæc situs est: postquam monuit tellure levandum
 Sponte sua visus dissiliisse 2 lapis.

Devenerare sacri custodem pignoris arcam,

Quisquis es antiquæ religionis amans.

Dic: Licet ostensum cervi inter cornua 3 Numen,

Myrtam oculis 4 captum, virgineumq; 5 peplum,

Et tot præterea miracula, quæ prior ætas

Et stupuit præsens, fas siluisse foret:

Virtutes, Meinolphe, tuas tamen ipsa sepulcri

Certarent, rupto marmore, saxa loqui.

N O T Æ

1. Ea scilicet inter Saxones nobilitate, ut puerum de sacro fonte suscipere dignatus sit ipse Carolus Magnus.

2. Post annos circiter ab obitu quinquaginta, sub Missa sacrificio coram omnibus lapis sepulchralis primum instat crucis divisus intonuit, deinde etiam in frustra minutus dissiluit.

3. Quo loco condendum Budicense Virginum monasterium erat, cervum vidit coram se genuflexum, & inter ejus cornua signum Dominice Crucis splendescere.

4. Meinhardus Attelensis prope locum eundem Parochus

chus ab apparente sibi ter Sancto, ut de elevando quam primum uti decreverat corpore Bisonem Ep. Paderborn. moneret, imperii exequendi moram cacitate luit: qua re, levatus est translatione peracta.

§ Ad viventis adhuc Meinolphi preces Virginis Sanctimonialis velum ab igne, in quo ardebat, illasum receptum est.

Hic ego, ut propositum initio fuerat, stare pralum jufferam; cum simul & typhetha nuntiat vacaturas in charta pagellas aliquot, & à Tua Humanissima Celsitudine adferuntur mihi Epigrammata elegantissima duo; quia confirmatam Tibi valetudinem pristinam, certam nobis magis ac magis faciunt, non debent à praesumpto argumento prorsus aliena videri: lectorem autem eo jucundius afficient, quo Augustissimi Caesaris felicitati boni omnes favent impensius. Hoc ergo epimetron, bona cum venia Tua, prioribus addo.



PHILIPPOPOLIS AD RHENUM

Philippis, urbi thessaliæ, comparata,

IMP. CÆS.

LEOPOLDI AVG.

Victoricibus armis crepta Gallis,

GERMANIÆ RESTITUTA.

An. MDCLXXVI. XV. Kal. Octobr.

CÆsar & Augustus, fatali Marte, Philippis
 Emathiæ cives vicit uterque suos,
 Fractaque libertas gemino Romana triumpho,
 Sustinuit dominos & grave ferre jugum.
 Tu patriæ vindex (qualis crudelia Perseûs
 Dicitur Andromedæ vincla levasse suæ)
 Eripis, ad Rhenum domitis, Leopolde, Philippis,
 Gallorum famulo libera colla jugo,
 Cæsare & Augusto major: quos cive perempto,
 At Te servato vincere cive juvat.

IMP.

I M P. C Æ S.

LEOPOLDI AV G.

E T

ELEONORÆ PALATINÆ

I M P. A U G U S T Æ

D I E S N U P T I A L I S,

XIX. Kal. Januarias, An. MDCLXXVI.

*Belligerantium Dania & Sveciæ Regum acerrimo
prælio memorabilis.*


A Cris Hyperboreos urit dum bruma Triones,
 Et Mars cognatas ducit in arma manus:
 Martis amica Venus; Volucres, ait, ite ministri,
 Ferte faces, arcus tendite, tela date.
 Est aliâ mundi pugnandum parte: triumpho
 Ter domitus nostro Martius Auster amet.
 Nec mora: quâ Cimber, quâ Rex fera prælia Svecus
 Luce ineunt, Cæsar fœdus amoris init.
 Pronuba Juno, precor, populorum vota secundet,
 Pactaque conjugij pignore firmet Hymen!
 Sic erit Austriacis tam læta & candida regnis,
 Quàm fuit Arctois tristis & atra dies.

120
APPROBATIO CENSORIS.

Pietas homini tutissima virtus. Id Cel-
fissimum & Reverendissimum
Principem & Episcopum *Ferdinandum*
suo experiri bono gratulor, qui à dif-
ficili & periculoso morbo valetudinem
sibi restitutam suæ in *S. Luciam Virgi-*
nem & Martyrem pietati acceptam
refert. Quare ipsius & amantium Poë-
tarum versus in lucem editos legi, ex-
empli interesse arbitror. Antuerpiæ
IV Idus Aprilis MDCLXXVII.

AUBERTUS VANDEN EEDE,
Archidiaconus & Can. Antuerpiensis
Libr. Cens.

99957643



1066.23

2





10/6

